

21/01/2003

Taman Botani Putrajaya janjikan pengembaraan hebat

Fazli Abdullah

PUTRAJAYA: Taman Botani Putrajaya yang mempunyai kira-kira 700 spesies tumbuhan-tumbuhan tropika dari lebih 90 negara, termasuk yang diancam kepupusan, akan menjadi tarikan baru pengunjung bukan saja untuk mengenali

alam tumbuhan tetapi sebagai pusat pendidikan dan penyelidikan.

Spesies yang ditanam di sini bukan saja sukar ditemui di tempat lain dan

berbentuk ganjil seperti Musa Ornata, pokok pisang yang jantungnya mendongak dan sejenis palma, Johannesteijsmannia Perakesnsis yang hanya boleh ditemui di Perak.

Lebih menarik, landskap taman ini turut dibangunkan mengikut reka bentuk

asal muka bumi dan tumbuh-tumbuhan pula berasal dari Afrika, Amerika Tropika dan Asia Pasifik.

Ada spesies berperanan sebagai penentu masa dengan bertindak balas berbeza-beza mengikut masa seperti pokok Brunfelsia. Warna bunganya bertukar setiap hari, hari pertama berwarna ungu dan bertukar merah jambu

pada hari kedua dan menjadi putih pada hari ketiga sehingga ia diberi nama

'Semalam, Hari Ini dan Esok'.

Selain tumbuh-tumbuhan, Taman Botani Putrajaya menyediakan sebuah Pusat

Interaktif bagi membolehkan pengunjung mengenali alam tumbuhan dengan menggunakan teknologi terkini dalam suasana menyeronokkan, sekali gus menjadi daya penarik terutama di kalangan murid sekolah.

Taman ini yang dibuka kepada orang ramai sejak 31 Ogos 2001, akan dirasmikan Perdana Menteri, Datuk Seri Dr Mahathir Mohamad pada 4 Februari

ini, sempena ulang tahun kedua penubuhan Wilayah Persekutuan Putrajaya.

Sempena majlis itu, Dr Mahathir diberi penghormatan menanam pokok palma

yang digunakan sebagai logo rasmi Taman Botani Putrajaya.

Spesies itu hanya boleh ditemui di Perak dan pembesarannya amat perlahan

serta dikatakan akan mengambil masa sekurang-kurangnya 30 tahun untuk berbunga.

Ia digunakan sebagai logo sebagai bukti peranan Taman Botani dalam pemuliharaan tumbuh-tumbuhan yang diancam kepupusan.

Taman yang merangkumi kawasan seluas 90 hektar, dibangunkan secara berperingkat bermula dengan fasa pertama di kawasan seluas kira-kira 25 hektar. Fasa II dan III, masing-masing akan dibangunkan secara berperingkat termasuk menanam pokok buah-buahan, tanaman herba dan tapak semaian.

Fasa pertama yang sudah dibuka kepada orang ramai merangkumi empat zon iaitu Laluan Jelajah, Bukit Palma, Taman Suria, Taman Flora dan Pesisiran

Tasik, selain bangunan pusat pelawat yang berbentuk kereta lembu.

Pengembaraan di Taman Botani Putrajaya yang dianggarkan mengambil masa kira-kira dua jam, akan memberikan pengetahuan dan pengalaman baru kepada pengunjung selepas melepasi setiap bahagian.

Bermula dengan Laluan Jelajah, pengunjung akan disajikan kehijauan tumbuh-tumbuhan apabila merentasi puncak pokok ketika melalui Titian Kanopi sejauh 170 meter pada ketinggian 10 meter dan seterusnya menyusuri

Denai Helikonia yang mempunyai 122 jenis heliconia seperti pokok pisang, Calathea, Marantha dan Ravenala. Selepas itu, pengunjung dapat melihat keindahan pokok pepanjat beraneka jenis di atas pergola seperti spesies Ducthman Pipe, di mana bunganya seolah-olah batang paip atau berbentuk seperti burung kenyalang.

Pengunjung juga boleh berehat seketika di kafe di Taman Pemanjat. Sebaik

menyambung pengembaraan, kira-kira 50 spesies palma menyambut kedatangan pengunjung di Bukit Palma.

Palma mempunyai ciri bentuk tersendiri dan salah satu daripada keluarga pokok yang terbesar di kawasan tropika seperti palma daun payung, palma kipas Cina dan rotan.

Sambil menyaksikan keindahan dan kesegaran pokok, pengunjung akan terpesona dengan keunikan landskap di Taman Flora yang menyediakan koleksi tanaman dari serata dunia, di mana bentuk muka bumi disesuaikan dengan asal usul tumbuhan berkenaan.

Koleksi Tanaman Afrika mempamerkan tumbuhan berasal dari negara di benua itu. Sesetengah spesies dibawa ke Malaysia sebelum zaman penjajah lagi. Antara pokok yang boleh ditemui ialah semarak api dan plumbago.

Koleksi Tanaman Amerika Tropika pula mempamerkan pokok Amerika Tropika dan kebanyakan spesies diperkenalkan di rantau ini oleh orang Portugis dan Sepanyol pada abad ke-16, antaranya pokok Bunga Merak yang juga dikenali sebagai Pride of Barbados dan pokok Kemboja.

Beberapa jenis pokok yang biasa ditemui di kawasan Asia Pasifik boleh dilihat di Koleksi Tanaman Asia Pasifik, antaranya pokok Ara dan Beringin, Ru, Pinang Raja dan Bunga Tapak Kuda. Pengunjung juga boleh berjalan di bawah naungan tanaman Bunga Kertas di Terowong Bunga Kertas.

Taman Suria pula menyediakan Sigai Seri dan Laluan Orkid kepada pengunjung. Yang paling menarik di sini ialah pengunjung boleh mengetahui waktu tanpa melihat jam dengan menggunakan jam suria, iaitu sebuah mercu tanda berbentuk obelisk - melambangkan kepentingan hubungan masa depan dengan alam tumbuh-tumbuhan.

Selepas melalui Laluan Orkid dan Sigai Seri, pengunjung dapat melihat koleksi siantan dan bunga raya beraneka warna di Pesisiran Tasik. Pengunjung seterusnya akan melepasi Laluan Pandanus yang penuh dengan keunikan tersendiri seperti pokok pandan berdaun panjang, meruncing, berduri, manakala batangnya berakar jangkang.

Ini diikuti Laluan Kana yang mempamerkan pokok Kana atau bungsa tasbih dari Amerika. Kana yang ada di sini adalah hibrid yang menghasilkan bunga

besar dan berwarna-warni. Sebelum menamatkan pengembaraan, pengunjung akan melalui Taman Paku Pakis yang mengingatkan kembali mereka kepada zaman silam.

Sepanjang menimba pengalaman baru di Taman Botani, pengunjung disediakan pelbagai kemudahan seperti kafeteria, tandas, tempat untuk bergambar, telefon serta kedai cenderamata. Pihak pengurusan taman juga menyediakan perkhidmatan fasilitator dan pemandu pelancong yang dikenakan bayaran.